



Broj: 01-02-1-365/25
Sarajevo, 12.03.2025. godine

Na osnovu člana 10. Zakona o Komisiji za vrijednosne papire („Službene novine Federacije BiH“ broj 39/98, 36/99, 33/04, 92/13 - autentično tumačenje, 6/17), a u vezi sa primjenom člana 247. Zakona o privrednim društvima („Službene novine Federacije BiH“ broj: 81/15 i 75/21), Komisija za vrijednosne papire Federacije Bosne i Hercegovine na 166. sjednici dana 12.03.2025. godine donosi sljedeće:

MIŠLJENJE

Članom 247. stav (2) Zakona o privrednim društvima propisano da se članovi nadzornog odbora imenuju istovremeno na period od četiri godine, što znači da po proteku perioda od četiri godine od dana imenovanja članovi nadzornog odbora to prestaju biti *ex lege*, čime im prestaju sva zakonska prava i obaveze vršenja dužnosti članstva u nadzornom odboru društva.

Članom 247. stav (7) Zakona o privrednim društvima propisano je da se postupak imenovanja i razrješenja nadzornog odbora i ostala pitanja koja se odnose na upravljanje u društvima sa učešćem državnog kapitala uređuje Uredbom o vršenju ovlaštenja u privrednim društvima sa učešćem državnog kapitala iz nadležnosti Federacije Bosne i Hercegovine („Službene novine Federacije BiH“ broj: 20/16, 3/17, 9/17, 69/17, 96/17 i 101/22).

Institut privremenog imenovanja odnosno nominovanja kandidata regulisan je navedenom Uredbom i Zakonom o ministarskim, vladinim i drugim imenovanjima Federacije Bosne i Hercegovine („Službene novine Federacije BiH“ broj 12/03, 34/03, 65/13) kojim se između ostalog propisuje postupak izbora kandidata u organima gdje država ima pravni interes, kao i način nominovanja kandidata, te izuzeća u primjeni ovog zakona kod privremenog imenovanja, odnosno nominacije ili imenovanja na najviše tri mjeseca.

Zakon o privrednim društvima, kao sistemski zakon kojim se reguliše pored ostalog i upravljanje dioničkim društvima, ne navodi mogućnost privremenog imenovanja. Naime, kako je već navedeno, članom 247. stav (2) Zakona o privrednim društvima propisano je da se članovi nadzornog odbora imenuju istovremeno na period od četiri godine, a izuzetno i kraće u slučaju propisanim članom 247. stav (5) istog Zakona.

Prema tome, Zakonom o ministarskim, vladinim i drugim imenovanjima Federacije Bosne i Hercegovine kao i Uredbom o vršenju ovlaštenja u privrednim društvima sa učešćem državnog kapitala iz nadležnosti Federacije Bosne i Hercegovine nije moguće utvrditi niti duži, a niti kraći mandat članovima nadzornog odbora od onog propisanog Zakonom o privrednim društvima kao sistemskim zakonom.

Osim toga, iako Zakon o privrednim društvima u članu 247. stav (7) upućuje na navedenu Uredbu, to opet ne znači da je moguće članu nadzornog odbora utvrditi mandat kraći od onoga koji je zakonom izričito propisan. Ovo podrazumijeva da, iako se radi o kandidatu koji se privremeno nominuje, nije potrebno putem skupštine društva donositi odluku o privremenom imenovanju te na taj način pokušati ograničiti mandat tako izabranom članu nadzornog odbora u skladu sa

Zakonom o ministarskim, vladinim i drugim imenovanjima Federacije Bosne i Hercegovine, te Uredbom o vršenju ovlaštenja u privrednim društvima sa učešćem državnog kapitala iz nadležnosti Federacije Bosne i Hercegovine.

Odredba člana (4) Zakona o ministarskim, vladinim i drugim imenovanjima se ima i mora smatrati ograničenjem samo za jednog dioničara (državu) i to u pogledu nominovanja svojih predstavnika, te Uredbom o vršenju ovlaštenja u privrednim društvima sa učešćem državnog kapitala iz nadležnosti Federacije Bosne i Hercegovine, predstavlja isključivo osnovu za ranije razrješenje kandidata (nakon najviše tri mjeseca) koji nisu prošli proceduru nominovanja, a nakon toga imenovanje kandidata u nadzorni odbor koji su prošli ovim zakonom propisanu proceduru nominovanja, a u skladu sa članom 247. stav (6) Zakona o privrednim društvima.

Imajuću u vidu sve prednje navedeno, propisano trajanje mandata članovima nadzornog odbora se, bez obzira na dio odluke o trajanju mandata, u konkretnom slučaju ima i mora smatrati mandatom u smislu sistemskog propisa, u trajanju od četiri godine, a sve kako je naprijed objašnjeno.



Predsjednik
Komisije za vrijednosne papire
Federacije Bosne i Hercegovine

Adnan Zukić
Adnan Zukić